

**Kejayaan Malaysia Dalam UNSC Satu Pengiktirafan Antarabangsa Terhadap Najib Bernama
Oct 17, 2014**

KUALA LUMPUR, 17 Okt (Bernama) -- Majlis Bekas Wakil Rakyat Malaysia (Mubarak) berpendapat kejayaan Malaysia menduduki satu daripada kerusi anggota tidak tetap Majlis Keselamatan Pertubuhan Bangsa Bersatu (UNSC) sebagai satu pengiktirafan antarabangsa terhadap kepimpinan Perdana Menteri Datuk Seri Mohd Najib Tun Abdul Razak.

Presidennya, Tan Sri Aziz Abdul Rahman berkata sejak mengambil alih pucuk pimpinan negara lima tahun lalu, Najib mengamalkan dasar luar yang mesra, tidak berat sebelah dan berprinsip yang mendapat sanjungan banyak pihak.

Katanya di bawah kepimpinan Najib, Malaysia memperkenalkan Pergerakan Kesederhanaan Global bagi menyemai peri pentingnya kesederhanaan dalam mendekati dan menyelesaikan konflik.

Sebagai tambahan, Malaysia juga memainkan peranan sebagai pengantara dalam konflik serantau seperti di selatan Filipina dan Selatan Thailand.

Semua usaha dan gerakan antarabangsa yang lain yang tidak henti-henti dilakukan Malaysia dalam tempoh lima tahun kebelakangan ini tanpa menjejaskan kepentingan negara sendiri sudah pasti diperhatikan negara-negara anggota UNSC, kata Aziz.

Oleh yang demikian, katanya, mereka tidak teragak-agak untuk mengundi Malaysia dalam Majlis Keselamatan dengan majoriti yang selesa.

Aziz juga mengucapkan tahniah kepada Perdana Menteri dan Menteri Luar Datuk Seri Anifah Aman dan anggota pasukannya yang bertungkus lumus mendapatkan sokongan untuk Malaysia.

Mereka harus berbangga kerana usaha mereka membawa hasil yang hebat, katanya.

Malaysia dipilih menduduki satu daripada kerusi anggota tidak tetap Majlis Keselamatan PBB di New York awal hari ini. Malaysia memperoleh 187 daripada 192 jumlah undi. Sebuah negara anggota mengecualikan diri.

Ini merupakan kali keempat Malaysia menduduki kerusi tidak tetap majlis itu. Ia menduduki kerusi itu pada 1965, 1989-1990 dan 1999-2000.

-- BERNAMA

Copyright © 2014 BERNAMA

Source :<http://www.bernama.com/bernama/v7/bm/newsindex.php?id=1077611>